

**Modul «Lirica»****Docent: Dumenic Andry****Datas: 1-11 / 15-11 / 22-11 / 6-12-2025**

«A poem should not mean

But be.»

*(Ina poesia na duess betg manegiar**Mabain esser.) Archibald MacLeish*

Poesias na vegnan betg giu da tschiel e na schabegian betg, poesias vegnan fatgas (Gottfried Benn). Ina part da la «producziun» da texts poetics cumpiglia il savair far che po vegnir promovì, sviluppà e perfecziunà. Quella part è il mastergn. L'autra part è il misteri. En quest lavoratori vuless jau stgaffir cundiziuns per daventar conscients dals process da lavur e per elavurar in instrumentari analitic ed expressiv, damai premissas favuraivlas per la creaziun poetica. La finamira è che las participantas ed ils participants chattian e contribueschian lur atgna vusch, lur moda autentica da far poesias, lur poetologia. Ina part integranta duai esser la lectura en gruppa e la discussiun da poesias en furma da lectorat collegial, ensemen cun in barat d'experienceschas cun las realitads da l'ediziun da lirica rumantscha.

Igl è impurtant da tegnair quint da l'individualitad da mintga persuna e da sia moda da lavurar.

In lavoratori da scriver s'occupa da proceders che furman la part conscienta e reflectada da la creaziun poetica, senza perder ord egl la vart inconscienta ed intuitiva.

Ils suandants temas vegnin nus ad approfundar:

**Furma**

En la poesia prevala la furma che sa manifestescha en la metrica ed il ritmus. La maioritad da nus vegn a far poesias en vers libers ed en strofas libras. Quels vegnan regulads sulettamain dal basegn e da l'intenziun expressiva da la poetessa e dal poet. Ma era vers libers han lur ritmus e lur musicalitad ch'èn da scuvrir.

**Lingua lirica**

Lirica vegn fatga cun plets. La poesia ha exigenzas pli autas envers la lingua. La lingua quotidiana famigliara na basta betg per la poesia. In da mes propierts è da svegliar e da promover betg mo il sentiment per il pled gist, ma er il senn per il nivel stilistic adequat. In auter element constitutiv da la poesia èn las figuras retoricas. En la poesia contemporanea han ils purtrets poetics: sumeglias, metafras, metonimia, sinecdocas, sinesthesias, oximorons e.a.p., ina posiziun impurtanta.

### Subject lyric

Poesias lyricas adopteschan per il pli la perspectiva dal subject. Ins discorra dal «jau lyric». Il «jau lyric» na coincide betg cun il jau empiric.

Il jau è l'istanza che discorra e che vesa e senta e percescha. Il sguard poetic vesa il mund cun l'egliada frestga e nova d'in uffant ch'è surprindì da tut. L'instrumentari principal èn ils senns ch'i sa tracta da gizzar.

### Cuntegn

Il cuntegn d'ina poesia n'è betg irrelevant, dentant secundar en confront cun la furma. Ina part da la lavur poetica è quella da chattar temas per poetisar. En quest connex sa confrunta la poesia pura cun la poesia engaschada.

Scolar il scriver e la reflexiun metodica pon ins en la gruppa. Per l'inspiraziun pon ins sulettamain empruvar da stgaffir premissas favuraivlas. S'inspirar pon ins laschar da pliras vuschs. Andri Peer distingua trais, en questa successiun: tadlar autras vuschs poeticas; tadlar las vuschs da la natira; tadlar la vusch interna. Leger poesias dad aut\*ras, classicas e contemporanas, è ina da las resursas indispensablas. Ins fa bain da tadlar autras vuschs, per chattar e furmar sia atgna.

### Barat cun l'autur\*a endvidad\*a

L'autura envidada è Simone Lappert (\*1985). Ella ha studegià litteratura a l'Institut svizzer da litteratura a Bienna e viva e lavura sco autura libra a Turitg. L'onn 2014 è cumparì ses emprim roman *Wurfschatten* en la chasa editura Metrolit, Berlin, 2014. Ses segund roman *Der Sprung* è cumparì il 2019 en la chasa editura Diogenes ed è stà nominà per il Premi svizzer dal cudesch. Il 2023 ha ella publitgà ses emprim cudesch da poesias *längst fällige verwilderung – gedichte und gespinnste*, medemamain tar Diogenes. Per quel ha ella survegnì ina distincziun litterara da la citad da Turitg.

### Biografia

*Dumenic Andry, naschì ils 7 da matg 1960, è creschì si a Ramosch en l'Engiadina Bassa. Studi da romanistica a l'Universitad da Turitg. Andry scriva poesias e prosa en vallader. El ha scrit contribuziuns per l'emissiun litterara Impuls da Radiotelevisiun Svizra Rumantscha RTR e columnas per La Quotidiana.*

*Ovras: Roba da tschel muond (2002), Uondas (2008), Sablun (2017), Zina zina zana (2023). Per il tom da poesias Sablun ha el survegnì in dals Premis svizzers da litteratura 2018. Sias ovras èn vegnidas transladas en tudestg, talian, franzos e rumen. Singulas poesias e texts da prosa èn cumparidas en pliras antologias.*

*Distincziuns: Premi da promoziun dal chantun Grischun 2003, Premi Schiller 2009 ed in dals Premis svizzers da litteratura 2018. Dumenic Andry viva a Zuoz e lavura sco translatur independent e lector.*